

# Ang Katapusan, Nag-inusarang Panaw sa Manluluwas

Ni Chakell Wardleigh  
Mga Magasin sa Simbahan

Sa tibuok Niyang mortal nga kinabuhi, ang Manluluwas misinati og daghang mga biyahe—ang Iyang panaw pagawas sa Betlehem ug ngadto sa Ehipto isip usa ka masuso nga bata, ang Iyang 40 ka adlaw nga panaw sa kamingawan, ang Iyang daghan nga mga panaw ngadto sa mga siyudad, mga baranggay, ug mga panimalay aron sa pagtudlo, pag-ayo, ug pagpanalangin panahon sa Iyang pangalagad, ug daghan pang uban. Apan adunay usa ka panaw nga kinahanglang atubangon sa Manluluwas nga mag-inusara, ug kini mao ang usa ka panaw nga Siya lamang ang makalahutay.

ECCE HOMO, NI LOUIS ROYER, RIJNSMUSEUM

“Sa Dominggo sa Pasko sa Pagkabanhaw atong gisaulog ang labing gipaabut ug mahimayaong hitabo sa kasaysayan sa kalibutan.

“Kini ang adlaw nga nag-usab sa tanan.

“Nianang adlaw, ang akong kinabuhi nausab.

“Ang inyong kinabuhi nausab.

“Ang padulngan sa tanang anak sa Dios nausab.”

Presidente Dieter F. Uchtdorf, Ikaduhang Magtatambag sa Unang Kapangulohan, “Ang Gasa sa Grasya,” *Liahona* Mayo 2015, 107.



Simon Dewey

O AKONG AMAHAN, NI SIMON DEWEY

## Pag-antus nga Walay Sama

Walay mortal nga hunahuna nga makatugkad sa hingpit nga kahulugan sa gibuhat ni Kristo sa Getsemani.

“Kita nasayud nga Siya nagsingot og daghang dugo sa matag lungag sa panit samtang Iyang gihurot ang linugdang sa mapait nga kopa nga gihatag sa Iyang Amahan ngadto kaniya.

“Kita nasayud nga Siya miantus, sa lawas ug espiritu, nga labaw pa sa posibleng maantus sa usa ka tawo, gawas nga siya mamatay.

“Kita nasayud nga sa pipila ka paagi, dili kini nato masabtan, ang iyang pag-antus nakatagbaw sa mga gipangayo sa kaangayan, mitubos sa mahinulsulong mga kalag gikan sa kasakit ug mga silot sa sala, ug mihimo sa kalooy nga maanaa niadtong kinsa nagtuo sa iyang balaan nga ngalan.

“Kita nasayud nga Siya natumba sa yuta samtang ang mga kasakit ug mga panghingutas sa walay katapusan nga palasanon nakapakurog kaniya ug buot unta nga dili Siya moinom sa mapait nga kopa.”

Elder Bruce R. McConkie (1915–85) sa Korum sa Napulog Duha ka mga Apostoles, “The Purifying Power of Gethsemane,” *Ensign*, Mayo 1985, 9.

**Personal nga Paggamit:** Bisan tuod dili kita kanunay makaamgo niini, giantus sa Manluluwas ang tanang matang sa kasakit panahon sa Pag-ula. Nakasabut siya sa tanang pisikal nga kasakit, gikan sa nabali nga bukog ngadto sa labing grabe nga malungtaron nga sakit. Gibati niya ang kangitngit ug kawalay paglaum tungod sa mga sakit sa hunahuna sama sa depresyon, kabalaka, pagkaadik, kamingaw, ug kasubo. Ug gibati Niya ang matag espiritwal nga samad tungod kay gidala Niya diha sa Iyang Kaugalingon ang tanang sala sa katawhan.

Si Elder David A. Bednar sa Korum sa Napulog Duha ka mga Apostoles mitudlo, “Diha sa higayon sa kahuyang mahimong mosinggit kita, “Walay nahibalo sama sa unsa kini. Walay makasabut.’ Apan ang Anak sa Dios hingpit nga nakahibalo ug nakasabut, kay Iyang nabati ug napas-an ang atong indibidwal nga mga alantuson” (“Makadaug sa Ilang mga Alantuson uban sa Kasayon,” *Liahona*, Mayo 2014, 90).